
ԴՎԻՆԻ ՍԱՍԱՆՅԱՆ ԵՐԿՈՒ ԿՆՔԱԴՐՈՇՄՆԵՐԻ ՄԱՍԻՆ

ԺԱՄԿՈՉՅԱՆ Ա. Ս.

1961-1962 թթ. Դվինի միջնաբերդի գագաթի արևելյան հատվածում բացվել էր 29x12.5 մ չափերի սպիտակ ավազաքարերի հիմքով ուղղանկյուն եռանավ մի սրահ՝ երկայնական երկու կողմերում չորսական սյուների մնացորդներով: Շինության կառուցողական առանձնահատկություններով հանդերձ՝ քաղաքի հիմնադրման ժամանակներին պատկանելության հարցը (IV դ.) մասնագետների շրջանում ամենևին կասկած չի հարուցել: Վիճահարույց էր կառույցի գործառական նշանակությունը՝ եկեղեցի¹, թե՛ պալատ: Պրոֆեսոր Կարո Ղաֆադարյանի կարծիքով սրահը Արշակունիների պալատի ավերակներն են²: Մինչդեռ Արամ Քալանթարյանը և Կորյուն Ղաֆադարյանը 1983-1985 թթ. կառույցը կրկին հետազոտելուց հետո այն գիտական շրջանառության են ներկայացրել իբրև հայկական քրիստոնեական առաջին եկեղեցիներից մեկը³: Հետազոտողների ուսումնասիրությունից պարզվել է նաև, որ շինությունը VI դ. վերջերին վերակառուցվել է՝ հիմք ընդունելով երկու հատակների մակարդակների տարբերությունը (20 սմ): Այս տարածքում VI դ. մշակութային հորիզոնում խիստ ավերված հում աղյուսով շարված սենյակում հայտնաբերվել է Դվինի՝ Սասանյան ժամանակաշրջանին (V-VII դդ.) պատկանող կնքադրոշմների մի համախումբ, որն աղբյուրագիտական գորեղ խթաններից է ժամանակաշրջանի գործող վարչական, քաղաքական կառավարման, առևտրական և պաշտամունքային խնդիրների հնագույն շերտերն ուսումնասիրելիս:

Վերոհիշյալ տեսակետներից ընդունելի է համարվում երկրորդը, քանի որ ներկայումս հիմքեր կան կարծելու, որ եկեղեցու հարևանությամբ դիվանի կենտրոնացումը պատահականություն չէր և, ըստ երևույթին, բրիտում էր սասանյան օրենսդրական և կանոնական հայեցակետից, այլապես անհասկանալի է սասանյան Թախտ-ի Մուլեյմանի դիվանի առկայությունը գլխավոր տաճարի անմիջական կից կառուցված սենյակում³: Կնքադրոշմները կավե փոքրիկ կառույցի զանգվածներ են, որոնք խոնավ վիճակում ամրացվել են առևտրական հակերին կամ մագաղաթներին, կնքվել համապատասխան կնիքով և չորանալուց հետո միայն ձեռք բերել փաստաթղթի արժեք: Ապացուցված է, որ կնքադրոշմների

¹ Ղաֆադարյան Կ., Դվինում պեղված ճարտարապետական երկու հուշարձան [Պատմա-բանասիրական հանդես (այսուհետև՝ ՊԲՀ), 1979, N 4, էջ 119-126], նույնի՝ Դվին քաղաքը և նրա պեղումները II, Ե., 1982, էջ 89-96:

² Քալանթարյան Ա., Ղաֆադարյան Կ., Եռանավ բազիլիկ եկեղեցի Դվինի միջնաբերդում (ՀՀ ԳԱԱ Լրաբեր հասարակական գիտությունների, 1996, N 3, էջ 66-71):

³ Huff D., *Technological Observations on Clay Bullae from Takht – I Suleiman* ("Mesopotamia", 1987, XII, fig. A., p. 368).

հուշարձաններում կապված էր առևտրական գործարքների, իրավական փաստաթղթերի՝ հրովարտականների, հրամանագրերի վավերացման հետ⁴:

Դվինից հայտնաբերված կնքադրոշմներն օժտված են նեղ, տափակ անցքերով, որոնցով անցել է թելը կամ ժապավենը: Վերջինս, շուրջբոլորելով առարկան, ամրացվել է որոշակի տեղում՝ մասնավորապես մագաղաթի դեպքում ձեռք բերելով փաթեթի ձև:

Ստորև մենք անդրադառնում ենք փաստաթղթեր վավերացնող կնքադրոշմների որոշ առանձնահատկությունների քննությանը:

Միջնադարում պետական կարևորություն ներկայացնող մագաղաթները ձևավորվել են ոսկե տառերով: Կաթողիկոս Եզրի և Բյուզանդիայի կայսր Հերակլի միջև կնքված պայմանագրի առիթով Ստ. Օրբելյանը գրում է. «*Ետ թագաւորն ոսկեգիր մագաղաթաւ պարգեւ*»⁵: Այսպիսով, առարկայի իսկությունը հաստատող կավե փոքրիկ կերտվածքը՝ հակիրճ արձանագրությամբ և որոշակի բովանդակություն ամփոփող հարդարանքով, իմաստավորում էր ժամանակի պետական ու գեղագիտական միտքը:

Ակնհայտ է, որ Դվինը սասանյան ընդարձակ տիրապետության սահմանային տարածքն էր, Կովկասի երկրները կառավարող մարզպանի նստոցը և, բնականաբար, նրա “Sahrmār divan Sahhama[r] yasxarhagir” (Շահրմար դիվան յաշխարհագիր)⁶ անունով դիվանը, որը կադաստրային արժեքների, կառավարման տարբեր բնագավառների, հրովարտականների, հրամանագրերի ու հրահանգների պահուստով կենտրոնացվել էր պետական նշանակություն ներկայացնող կառույցին կից:

Ցավոք, մեզ հասած հայկական սկզբնաղբյուրների տեղեկությունները վերաբերում են միայն կաթողիկոսական դիվանին: Ուխտանեսը Սմբատ Բագրատունու մասնակցությանը Դվինի եկեղեցական ժողովի առիթով գրում է. «*Եւ զիւր ձեռնարկն տայ նոցա նմանապէս ուղիղ և ճշմարիտ խոստովանութեամբ և մեծ ըզգուշութեամբ կնքեալ և պահեալ ի տուն Տեառն*»⁷: Իսկ «Գիրք թղթոցում» տարբեր աղանդների դեմ հայոց եկեղեցու մղած պայքարին նվիրված հոդվածներից մեկն արձանագրում է. «*Եւ կնքեցաք զձեռնարկս այս և եղաք ի սուրբ եկեղեցւոցս Դոււնաք*»⁸:

Տարիներ շարունակ իրականացվող պեղումներով Դվինի կաթողիկոսական դիվանի հետքերը գտնելու ակնկալիքներն ապարդյուն էին: Անշուշտ, պատճառը պիտի փնտրել 893 թ. երկրաշարժից հետո կաթողիկոսի հեռանալու պարագայում, որ, բնականաբար, ենթադրում էր կաթողիկոսական դիվանը տեղափոխելը:

Դվինի կնքադրոշմների հավաքածուն հիմնավորապես քննության է արժանացել Ա. Քալանթարյանի շահեկան ուսումնասիրության էջերում⁹: Հավաքածուի տասներկու մեկական կնիքով դրոշմագարդված դրոշմակնիքներից մեր ուսումնասիրության թեման պաշտոնական երկու դրոշմա-

⁴ Калантарян А., Раннесасанидские буллы Двина, Е., 1982, с. 54-55.

⁵ Պատմություն նահանգին Միսական արարեալ Ստեփաննոսի Օրբելեան արքեպիսկոպոսի Միւնեաց, Թիֆլիս, 1910, էջ 118:

⁶ Khurshudian E., Die Parthischen und Sasanidischen Verwaltungsinstitutionen, Yerevan, 1998.

⁷ Ուխտանես եպիսկոպոս, Պատմություն Հայոց, Վաղարշապատ, 1871, էջ 54-59:

⁸ Գիրք թղթոց, Թիֆլիս, 1901, էջ 149:

⁹ Калантарян А., նշվ. աշխ.:

կնիքներն են, որոնք պատմական իրողությունները մեկնաբանելու փաստագրական արժեքավոր նյութեր են և հիմք են տալիս որոշակի հետևություններ անելու: Սասանյան իրականության մեջ պաշտոնական կնիքները շրջանառություն են ունեցել Կավատ Բ-ի (498-531 թթ.) օրոք՝ իրավունք վերապահելով մոզպետներին, ֆինանսական պաշտոնյաներին, համարկարներին՝ օգտվելու պաշտոնական կնիքների ընձեռած արտոնություններից: Խոսքով Ա Նուշիրվանի օրոք (531-579 թթ.) այդ իրավունքներն ամրագրվեցին իր իսկ հովանավորությամբ ձևավորված դատաստանագրքում՝ մասնավորապես օրինականությամբ օժտելով պաշտոնյաներին. «*Իրենց պաշտոնական կնիքով այլ ոչ անհատական մոզպետը և դատավորը պիտի կնքեն դատական փաստաթղթերը և ուղարկեն այլ շահիր կամ թատուկ*»¹⁰:

Դատաստանագրքում կան պաշտոնական կնիքների վերաբերյալ այլ հիշատակություններ, որոնք փաստում են պետական կարևոր վավերագրերի հաստատման պարագաներում այդ իրավունքը կրողի իշխող դերը¹¹: Ուսումնասիրվող կնքադրոշմներից մեկը (ՀՊԹ 1981/78)1.9x1.9 չափերի է (նկ. 1): Կիսալուսինների բաղադրիչների միահյուսումով դրոշմագարդված հորինվածքը, որը միջին պարսկերենում nišan (նշան) է կոչվել, հաճախ մեկնաբանվել է իբրև Գանձակի Ատուր Գուշնասպ կրակի տաճարի գրաֆիկ արտացոլումը¹²: Այդ տեսակետը վիճարկող գիտնականների մեկ այլ խումբ նշանն ըմբռնում է իբրև բարձրաստիճան պաշտոնյաների մոնոգրամներ¹³: Հակված ենք ընդունելու առաջին տեսակետը, մանավանդ որ ուսումնասիրվող կնքադրոշմի վրա Whrmz(dy) Gwšnspry (Ուրմիզդ Գուշնասպ) բանաձևին ուղեկցում է նշանի հորինվածքը՝ իբրև սրբության խորհրդանիշ: Սա, ըստ երևույթին, ինչպես Ա. Բորիսովն է նշում, պիտի ընկալվել իբրև կրկնակի սրբությունների բովանդակությամբ ձևավորված մի կնքադրոշմ, որը, անկասկած, պատկանել է մեծ իրավունքների տնօրինող մոզի¹⁴: Նմանատիպ կնքադրոշմներ պեղումներից հազվադեպ են: Բացի Դվինից, հայտնի են Ակ-Դեբեի¹⁵, Թախտ-ի Սուլեյմանի և Մինգեչաուրի¹⁶ օրինակները:

Ակ-Դեբեի (Թուրքմենիա) և Թախտ-ի Սուլեյմանի գտածոները VI- VII դդ. թվագրվող մշակութային շերտերից են, իսկ Մինգեչաուրի օրինա-

¹⁰ **Периханиян А.**, *Сасанидский судебник*, Е., 1973, с. 288, 346.

¹¹ Նույն տեղում, էջ 285, 289, 315:

¹² **Пугаченкова Г.**, *Материалы по восточной глиптике (Труды Среднеазиатского государственного университета, вып. CXI. Археология Средней Азии, Ташкент, 1957, с. 148)*; **Борисов А., Луконин В.**, *Сасанидские геммы*, Л., 1963, с. 42.

¹³ **Herzfeld E.**, *Kushano Sasanian Coins (Memoires of the Archaeological Survey of India, Calcutta, 1930, p. 17)*.

¹⁴ **Борисов А.**, Об одной группе сасанидских резных камней (Труды отдела Востока Эрмитажа, т. 1, 1939, с. 239).

¹⁵ **Губаев А.**, *Поселения сасанидского времени в южном Туркменистане, автореф. канд. дисс., Л., 1967, с. 8*; **Huff D.**, նշվ. աշխ.:

¹⁶ **Асланов Г.**, *К изучению раннесредневековых памятников Мингечаура (Краткие сообщения, 1955, 60, с. 70)*.
Լրաբեր 2-16

կը նշանով մի կնիք է, որի արձանագրությունը, ցավոք, չի ընթերցվում և կրում է վաղմիջ-նադարյան ընդհանուր թվագրություն (V-VII դդ.):

Գուշնասպ տաճարից հայտնի են ոչ միայն մոզերի, այլև դպիրների¹⁷ և գանձապետների¹⁸ անուններով արձանագրված կնիքներ և կնքադրոշմներ, որոնք վկայում են սասանյան հսկայածավալ տաճարային հաստատության բազմաճյուղ համակարգի գործունեության ոլորտները:

Դվինի կնքադրոշմի վրա արձանագրված մանրամասները համապատասխանում են Գանձակի (Թախտ-ի Սուլեյմանի) տաճարին վերագրվող ատրիբուտներին, այն է՝ ռազմիկներին նվիրված մի սրբատեղի, որ միաժամանակ ծառայում էր արքաներին: Շահնամեի տարաբնույթ հատվածներում արձանագրված են սասանյան արքաների (Խոսրով Նուշիրվանի և Խոսրով Փարվեզի) կյանքի դրվագները՝ տաճարին մատուցված զոհաբերությունները, ուխտագնացությունները, օտար երկրներից եկվոր թագուհիների հավատափոխությունը և այլ արարողությունները, որոնք իրականանում էին Ատուր-Գուշնասպ տաճարում:

Սասանյան վաղ շրջանի արձանագրությունները Գանձակի կրակի տաճարը չեն հիշատակում: Մ. Բոյսը սրբարանը թվագրում է IV-V դարերով¹⁹: IV դ. տաճարի գոյությունը հաստատում է նաև ասորական մի սկզբնաղբյուր: Ասորի նահատակ Յազբանդուխտի վկայաբանության էջերում հիշատակվում է, որ գործողությունն իրականացրել է Ատուր-Գուշնասպ անունով մի մոզ²⁰:

Փաստորեն, IV դարում սրբատեղին մոզերի գործող համակարգով ձևավորված հաստատություն էր, սակայն գործունեության ակտիվ ժամանակաշրջանը VI-VII դդ. (ուշ սասանյան շրջան) էր:

Գուշնասպը՝ իբրև VI դարի գործող սրբատեղի, արձանագրված է նաև Սեբեոսի «Բագինս Հրատին մեծի որում Վշնասպն կոչէին» և Թովմա Արծրունու պատմության էջերում. «Եվ ճանապարհ արարեալ ընդ կողմն հիւսիսոյ ել դեպ ի Կարնոյ քաղաք և անցանէր Շիրակ և հասեալ ի Դուին աւերէ զնա և զՆախճատան և զօրմի և դիմեալ ի Գանձակն Ատրպատականի Բրէ զնա աւերէ զԱհմատան և զՄայ, կործանէ և զԲագինս Հրատին մեծ որում Վշնասպն կոչեն»²¹:

Մյուս կնքադրոշմը (ՀՊԹ 1981/79) 1.2x1.2 չափերի է և դրոշմագարդված կիսալուսինների բաղադրիչների մեկ այլ տարբերակով (նկ. 2)՝ շուրջը պահլավերեն հետևյալ արձանագրությամբ [A]twr[.....]ZY, mwgw (հուր, կրակի տաճարի մոզ): Կնքադրոշմի զուգահեռ կնիք հայտնի է Լուվրի նգարանից և հրատարակված է իբրև Գուշնասպի մոզերից մեկի կնիքը²²:

¹⁷ Göbl R., *Tombullen von Tacht-i Suleiman*, Berlin, 1976, 52, N 6a, Gignoux Ph., *Noms Propres sasanides en moyen perse epigraphique*, Wein, 1986, N 430, p. 95.

¹⁸ Борисов А., նշվ. աշխ., էջ 236:

¹⁹ Бойс М., *Зороастрийцы*, М., 1987, с. 50.

²⁰ Տեր-Պետրոսյան Լ., Աբրահամ Խոսրովանուշի Վկայք Արևելից, Ե., 1976, էջ 130-131:

²¹ Սեբեոսի *Եպիսկոպոսի* պատմություն, Ե., 1939, էջ 27, 29, 80, Թովմա Արծրունի *և Անանուն*, Պատմություն տան Արծրունեաց, Ե., 1985, էջ 138:

²² Gignoux Ph., *Catalogue des sceaux camees et bulles Sassanides de la bibliotheque National et du Musée Louvres*, Paris, 1978, p. 22, tabl. 2-21.



Նկար 1



Նկար 2

Ուստի համադրելով մեր տրամադրության տակ եղած նյութը՝ կարող ենք ենթադրել, որ կնիքն ու կնքադրոշմը պատկանել են Ատուրգուշնասպ կրակի տաճարի բավական լայն իրավունքներով օժտված մոզի, որը, հավանաբար, իր կնիքով հաստատել է արքայի արձակած և Հայաստան ուղարկվող հրամանագրերն ու հրովարտակները:

Դվինի կնքադրոշմներն արժեքավորվում են նաև իբրև տեղագրության ու պաշտոնյայի անունն արձանագրող վավերագրեր: Այդ իմաստով, երբ անդրադառնում ենք Ա. Կոլեսնիկովի ընդունած կնիքների ու կնքադրոշմների տեսակավորման ցուցատախտակին, նյութն ամփոփվում է նրա մշակած համակարգի երկրորդ խմբում, որտեղ հիշատակվում է ոչ միայն տեղագրության (Գանձակի Ատուրգուշնասպ), այլև մոզի անունը՝ Որմիզդ, Ատուր²³: Իսկ մոզերը սասանյան իրավակարգի սանդղակում արքայից հետո երկրորդ տեղն էին զբաղեցնում²⁴, և դատաստանագրքում նրանց կնիքները հիշատակվում են իբրև պաշտոնական:

Ինչպես տեսանք, առայժմ շերտագրական որոշակի միջավայրից հայտնի կնքադրոշմները VI-VII դդ. Դվինից²⁵, Ակ-Դեբեից, Մինգեչաուրից և Թախտ-ի Սուլեյմանից են:

Աշխարհում շրջանառու մնացած հրատարակությունների նյութը անորոշ ծագումով է, և հեղինակները, գտածոների բուն ակունքի վերաբերյալ տվյալների չտիրապետելով, տեսակավորումը և թվագրումն իրականացրել են տեսական դրույթների և արձանագրությունների տվյալների հիման վրա:

Եթե կնքադրոշմների գործառույթի սահմանագիծն ընդունենք VI դարը, ապա քաղաքական իրադարձությունները պետք է կապել Խոսրով Ա

²³ Колесников А., Проблемы атрибуции административных топономик на официальных печатях (Восточное историческое источниковедение и специальные исторические дисциплины, вып. I, М., 1989, с. 247).

²⁴ Периханян А., Общество и право Ирана в парфянский и сасанидский периоды, М., 1983, с. 18.

²⁵ Դվինի ուսումնասիրվող կնքադրոշմները մշակութային նույն, բայց տարբեր քառակուսիներից են (1955 թ. գտնված) և հայտնաբերվել են արագիլի պատկերով սասանյան մի կնիքի հետ:

Նուշիրվանի (531-579 թթ.) հայտնի բարենորոգումների փաթեթի հետ, որով կադաստրային խնդիրներում կանոնավորվել էր հարկերի և տուրքերի համակարգը²⁶, գանձարանը հարստացել էր՝ ապահովելով ռազմական բարենորոգումների համար անհրաժեշտ միջոցները: Վերջինս Բյուզանդիայի դեմ մղվող պատերազմներում առաջնահերթ կարևորություն ներկայացնող բարենորոգումներից էր: Դվինը, լինելով սասանյան տիրապետության մի հատված, այդ փոփոխություններին պիտի բերեր իր մասնակցությունը՝ կենտրոնից ուղղորդվող հրովարտակներով ու հրամանագրերով:

Կնքադրոշմների՝ VII դարով թվագրությունն ընդունելիս Դվինի քաղաքական կյանքը կապվում է Խոսրով Բ Փարվեզի (590-628 թթ.) ժամանակների քաղաքական ու դավանաբանական խնդիրներում առկա շոշափելի փոփոխությունների հետ:

Նկատի առնելով 572 թ. ապստամբության դասերը, պարսկա-բյուզանդական հակամարտության պատճառով երկրում ստեղծված քաղաքական ճգնաժամը՝ Խոսրով Բ Փարվեզը ծրագրեց մի նոր քաղաքականություն՝ խանգարել Բյուզանդիայի հզորացմանը և սահմանների ընդարձակմանը՝ ի հաշիվ Պարսկաստանի: Այդ նպատակի իրականացման համար հարկ էր շեղել հայ նախարարներին բյուզանդական կողմնորոշումից²⁷ և մշակել կրոնադավանական նոր սկզբունքներ: Զգալով կայսրությանը սպառնացող ահեղ վտանգը՝ Խոսրով Բ-ն առաջին հերթին հեղաշրջեց նախորդ արքաների մոլեռանդ դավանափոխության քաղաքականությունը: Տիգրանի եկեղեցական 618 թ. ժողովում նա Պարսկաստանի սահմաններում ապրող հպատակ բոլոր քրիստոնյաներին հարկադրեց ընդունելու միաբնակության կանոնները: Ինչպես Մ. Օրմանյանն է նշում, շարժառիթը քաղաքական էր, որովհետև «*Խոսրովի աչքին մեծ նշանակություն ունեցած պիտի չլլար Քրիստոսի բնությանը միավորության կամ երկվության խնդիրը*»²⁸: Այնուհանդերձ, թեկուզ և քաղաքական նպատակներից բխող այս քայլը Հայաստանում ձեռք բերեց որոշակի քաղաքացիություն, նորոգեց դավանանքի մթնոլորտը՝ արմատավորելով միաբնակ եկեղեցու սկզբունքները:

Մյուս կողմից, ինչպես Ռ. Ֆրայն է գրում, զրադաշտականությունը սպառել էր իրեն, և աղանդավորական տարբեր շարժումների աշխուժացումը (մանիքություն, նեստորականություն) սպառնում էր ներքուստ խարխիլել երկրի հիմքերը²⁹: Քրիստոնեության սկզբունքներն այդ ժամանակահատվածում դարձել էին այնքան ընդունելի, որ փորձ էր արվում զրադաշտականության և քրիստոնեության միջև հնարավոր ընդհանուր եզրեր գտնելու: Երկու վարդապետությունների ընդհանուր ակունքները շեշտելու փորձերն արտացոլվում էին ավանդություններում: Օրինակ, պահպանվել է Աբուլ Դուլաֆի գրառած մի ավանդություն, որտեղ զրադաշտական կրոնի են փոխանցվում քրիստոնեական հավատքի որոշ

²⁶ Луконин В., Сасанидское серебро, М., 1987, с. 19.

²⁷ Իսկանյան Հ., Հայ բյուզանդական դաշինքը Պարսկաստանի դեմ (ՊԲՀ, 1963, N 4, էջ 51):

²⁸ Օրմանյան Մ., Ազգապատում, Պոլիս, 1913, էջ 489:

²⁹ Фрай Р., Наследие Ирана, М., 1972, с. 325.

դրվագներ: Ավանդության համաձայն՝ Պարսկաստանի արքա Խուրմագին (ըստ երևույթին Որմիզդն է 272-273 թթ.) լուր է հասնում Բեթղեհեմում սրբազան երեխայի ծննդյան մասին, ու ինքը մոզի միջոցով իբրև նվեր յուղ և խունկ է ուղարկում, որպեսզի իր երկիրն օրհնվի նորածնի կողմից: Մարիամն այդ մոզին հանձնում է հող և հայտնում, որ այդ հողը ցանելու դեպքում տեղում պիտի քաղաք հիմնվի: Եվ Որմիզդն այնտեղ, որտեղ լույս էր ճառագել, կառուցում է կրակի տաճար՝ Ատրգուշնասպը³⁰: Նույն ավանդությունը քիչ այլ մեկնաբանությամբ արձանագրված է սիրիական «Գանձերի քարանձավ» հուշագրությունում VI-VII դդ., ըստ որի՝ մոզերից մեկը Որմիզդ անունն էր կրում և ապրում իր Ատրպատականում³¹:

Խոսքով Բ-ն, Դվինում հայ մարզպան Սմբատ Բագրատունուն նշանակելով, փոխեց նաև իր տիրապետության ծայրամասերի կառավարման համակարգը: Այդ փոփոխությունը նորամուծություն չէր, որովհետև այդ քայլի իմաստությունը V դարում հասկացել էր Վաղարշը (484-488 թթ.):

Հատկանշական է պարսիկ մարզպան Անդիկանի հետևյալ հաղորդումը. «*Եւ դարձեալ օտար մարզպանն երթայ յաշխարհն Հայոց յաշխարհն մեծ է յամս երկուս և երիս հազիւ կարէ ճանաչել նախ զիրս աշխարհն զլաւսն և զվաթարսն, զապիրատսն և զպիտանիսն, և վարելով ըստ անգիտութեան խառն ի խուռն... մարզպանն պարսիկ որ երթայ յաշխարհն կնաւ երթայ և որդւովք, դրամբ և սիրելովք, ծառայիւք և աղախնեօք և այնք ամենեքեան թէ զԱրեաց տեառն զոռճիկ ուտեն չէ սակաւ ծախսն, և թէ աշխարհքն ուտեն՝ շատ վտանգ հասանէ աշխարհին մարդկան: Իսկ նա թէ լինի զիր տանն համբար ուտէ և այն ամենայն յարքունի գանձ համարի. . .*»³²:

Սմբատ Բագրատունու մարզպանության ժամանակաշրջանը նպաստավոր էր և հայ նախարարների պարսկամետ կողմնորոշումն ապահովելու համար: Ճիշտ կռահելով պահի կարևորությունը՝ նա պայքարի թիրախ դարձրեց ոչ միայն տեղի քաղկեղոնականությանը հարող նախարարներին և հոգևորականությանը, այլև սասանյան կայսրության հա-մար վտանգ ներկայացնող Վրաստանի դավանափոխության դիրք ընդունած Կյուրոնին: Այդ մասին «Գիրք թղթոցում» կան Սմբատ Բագրատունու նամակները՝ ուղղված Կյուրոնին՝ հետ կանգնելու քաղկեղոնական կողմնորոշումից³³:

Դվինում ստեղծված հարաբերական խաղաղ պայմաններում իրականանում էին շինարարական որոշակի աշխատանքներ: «Շինեն նախարարք Հայոց իւրաքանչիւր պալատս արքունական և դաստակերտս յականաւորս և զքաղաքն որմնափակօք պարսպեն և խաղաղեցուցանեն զերկիրս»³⁴: Դվինում պետական մտածելակերպով հասարակական շինությունների և

³⁰ Minorsky V., *Two Iranian Legends in Abu Dulaf's II Risalah (Archaeologia Orientale in Memoriam Ernst Herzfeld, N. Y., 1952, p. 172-175).*


³¹ Луконин В., *նշվ. աշխ., էջ 102:*

³² Ղազար Փարպեցույ Պատմութիւն Հայոց, Թուրք առ Վահան Մամիկոնեան, դրվագ Գ, ԴԸ, Ե., 1982, էջ 430:

³³ Գիրք թղթոց, էջ 168-169:

³⁴ Թովմայի Վարդապետի Արժրունույ Պատմութիւն տանն Արժրունեաց, Թիֆլիս, 1917, էջ 138:

նրանց կառուցապատման նախագծերը, անկասկած, իրականություն էին դառնում բուն կայսրությունից բխող հրամանագրերով կամ հրովարտականերով: Նման հիմնավոր շինություններից մեկը շուրջ 30 տարի պեղվում է Դվինի միջնաբերդի հարավային բուրգի շրջանում (նկ. 3, 4): V դ. կառուցված և բազմաշերտությամբ հայտնի



Նկար 3



Նկար 4

հսկայածավալ այս կառույցի մշակութային կերտվածքներից մեկը VI-VII դդ. վերակառուցված շինության հատվածներից է հատկանշական նյութերով՝ եռանիստ նետապալ սասանյան մաշված դրամ և ամենակարևորը՝ դրոշմագարդ անոթի մասն ու բրոնզե կափարիչը (նկ. 5, 6), որոնց հարդարանքը բուսական ոճավորված



Նկար 5



Նկար 6

միջավայրի երիզափակ շրջանակի մեջ դեմ դիմաց գլուխները հակադիր ուղղությամբ պատկերված թռչունները, սասանյան արվեստում տարածված թեմաներից է և բազում զուգահեռներ ունի համաժամանակյա այլ հուշարձաններում³⁵:

³⁵ Бадер О., Уникальный сосуд из Кунгура (Вестник древней истории, 1948, N 3, с. 166), Иерусалимская А., К сложению школы художественного шелкоткачества в Согде (Средняя Азия и Иран, Л., 1972, с. 25, рис. 13з).

Ուսումնասիրված կնքադրոշմները պետք է վերագրել VI-VII դդ. քաղաքական հեղաշրջման ժամանակաշրջանին, երբ Դվինում իրականացվող պետական մասշտաբի տնտեսական ու շինարարական բարեփոխումները, անշուշտ, իրականացվում էին բուն կենտրոնից ուղղորդվող հրահանգներով: Իսկ թե ինչու այդ հրահանգները տեղ էին հասնում Գանձակից, բացատրությունը մեկն է. Գանձակը Ատրպատական սասանյան տիրապետությունը Հայաստանին կապող ամենակարճ բանուկ ճանապարհն էր, որը հիշատակվում է Անանիա Շիրակացու թվաբանական խնդիրներից մեկում³⁶:

Այսպիսով, Դվինի պաշտոնական այս երկու կնքադրոշմները ժամանակի կարևոր վավերագրերի թվին են պատկանում և պատմական խնդիրների մեկնաբանման առաջնահերթ սկզբնաղբյուրներից են:

О ДВУХ САСАНИДСКИХ БУЛЛАХ ИЗ ДВИНА

ЖАМКОЧЯН А. С.

Резюме

В ходе археологических работ в цитадели Двина были найдены остатки раннехристианской церкви, к которой прилегало полуразрушенное строение. Согласно стратиграфическим данным, оно относится к позднеасанидскому (V-VII вв.) периоду. В нем обнаружена большая коллекция булл, из которых 12 являются официальными. Среди них примечательны две буллы, на которых имеются надписи на среднеперсидском языке, а также печати, подтверждающие их принадлежность зороастрийским магам из храма Гушнасп (Атропатена).

Двин являлся центром Сасанидского марзпанства, и рассматриваемые буллы свидетельствуют о наличии указов, рассылаемых в марзпанстве в V-VII вв. Сасанидские буллы являются важным источником для изучения истории Двина.

³⁶ Կանոնագիրք Հայոց, հ. Բ (Վ.Հակոբյանի աշխատասիրությամբ), Ե., 1971, էջ 264-265: